

այդ մասին որևէ որոշում չտւեց, և դրօշակն իր ամբողջութեան մէջ, գոյների ընտրութիւնն ու դասաւորութիւնը, աւելի շուտ, արդիւնք էր քէտարկութեան պատահականութեան:

Պատգամաւորների մի մասի կողմից մասնաւոր առարկութիւն էր լսուում — գլխաւորապէս գործնական տեսակէտից — նարնջագոյնի դէմ — Հայաստանում դժւար էր այդ գոյնի կտոր գտնել: Առաջարկուում էր փոխարէնը դնել կանաչ գոյն. ոմանք փաստ էին բերում, որ կանաչը մեր պատմական գոյներից մէկն է: Բայց նարնջի գոյնը առանձնապէս պաշտպանում էր Քաջագունին, որ ղեկավարում էր սոսկ գեղասիրական նկատումներով. կարմիրի, կապոյտի և նարնջագոյնի ներդաշնակութիւնը դիւր էր գալիս նրա ճաշակին:

Կային, սակայն, հայկական եռագոյնի մէջ և գաղափար ու խորհուրդ դնողներ: Այդ գոյները, կարծես, բխում էին մեր կեանքից, խորհրդանշում էին հայ պետականութեան ծագումն ու ապագան: Կարմիրը հայ ժողովրդի թափած արիւնն էր. կապոյտը՝ Հայաստանի կապոյտ երկինքը և նարնջի կամ ոսկու գոյնը՝ խտացումը աշխատանքի: Հայ ժողովուրդը, որ արիւնով էր ձեռք բերել իր ազատութիւնը, հայրենի կապոյտ երկնքի տակ, իր համբաւաւոր աշխատասիրութեամբ՝ պիտի վերաշինէր երկիրը և ապրէր ազատ ու երջանիկ...

Հայաստանի Սորհրդի պաշտօնական բացումը նշանակւեց օգոստոս 1-ին:

Երկու օր առաջ, յուլիս 30-ին, Երևան եկան գերմանական ներկայացուցիչ զօր. Ֆոն-Քրեսը և անտրիական ներկայացուցիչ բարոն Ֆրանկելը՝ Հայաստանի դիւ. ներկայացուցիչ Ա. Ջամալեանի և մի քանի սպանների ուղեկցութեամբ: Կայարանում նրանց ցոյց տրւեց հանդիսաւոր ընդունելութիւն: Երեկոյեան տրւեց հացկերոյթ քաղաքագլխի կողմից:

Յաջորդ օր նրանք այցելեցին վարչապետին ու Հայաստանի Սորհրդի նախագահին, ապա մեկնեցին էջմիածին՝ տեսնելու համար կաթողիկոսի հետ: Ժամը 5-ին վերադարձան էջմիածնից և ընդունեցին Հայաստանի Սորհրդի ու վարչապետի փոխայցելութիւնը և ունեցան նրանց հետ երկար խօսակցութիւն՝ հայկական գործերի մասին: Նրանց այցելեցին և միւս նախարարները: Երեկոյեան կառավարութիւնը հացկերոյթ տւեց ի պատիւ հիւրերի, որին ներկայ էին և Երևանում գտնուող թիւրք սպանները: Արտասանւեցին ճառեր: Գիշերը Ֆոն-Քրեսը մեկնեց Թիֆլիս, իսկ բարոն Ֆրանկելը մնաց Հայաստանի Սորհրդի բացմանը ներկայ գտնւելու համար: Առաջին դիւանագիտական ընդունելութիւնն էր այս Հայաստանի հողի վրա:

*

Օգոստ. 1-ին, Երևանի քաղաքային ակումբի դահլիճում, հանդիսաւոր չքով բացւեց Հայաստանի Սորհրդի անդրանիկ նիստը: Քաղաքը ընդունել էր տօնական կերպարանք: Փողոցները բռնած էին բազմութիւններով: Ակումբի առջև երկկարգ շարւած էր գործը: